

Ekstrem dan Melampau dalam Pengistilahan al-Qur'an dan Hadith: Analisis Terhadap Pemahaman daripada Teks

Khadher Ahmad

Universiti Malaya, khadher82@um.edu.my

Mustaffa Abdullah

Universiti Malaya, mustaffa@um.edu.my

Mohd Yakub @ Zulkifli Mohd Yusoff

Universiti Malaya, zulkifli@um.edu.my

Sedek Ariffin

Universiti Malaya, sedek2001@um.edu.my

Abstrak

Ekstrem dan melampau adalah merujuk kepada perilaku atau tindakan luar daripada kebiasaan. Dalam pengistilahan al-Quran dan hadith, terdapat beberapa istilah yang boleh dikaitkan dengan maksud ekstrem atau melampau. Justeru, artikel ini bertujuan untuk mengenalpasti istilah-istilah dalam pemakaian teks al-Quran dan al-hadith lalu dikeluarkan pemahaman dan skop penggunaannya dalam teks. Analisis sepenuhnya menggunakan pendekatan induktif dan deduktif supaya dapat dikenalpasti dan dijelaskan maksud keseluruhan pengistilahan tersebut. Hasil kajian mendapati bahawa istilah dalam pemakaian al-Quran yang merujuk kepada maksud ekstrem atau melampau adalah *Ta'lu* (ghuluw), *Ta'taddu* (melampaui batas) dan *Tatghaw* (melampaui batas). Manakala dalam hadith pula menggunakan istilah *Tanaḥḥu'* (sikap ekstrem), *Tashaddud* (memberat-berat), *Takalluf* (memaksa-maksa diri) dan *I'tidā'* (melampaui ketentuan syariat). Keseluruhan istilah dalam al-Quran dan hadith tersebut adalah merujuk kepada beberapa bentuk sikap dan tindakan ekstrem atau melampau iaitu melampau dalam aspek ibadah dan pelaksanaannya (seperti solat, puasa dan berdoa), melampau dalam aspek muamalah (seperti aspek halal dan haram berkaitan makanan dan minuman, ikatan perjanjian dan sebagainya), melampau dalam aspek akidah dan juga melampau dalam aspek dosa dan pahala.

Kata kunci: ekstrem, ekstremis, fanatik, taasub, ideologi, masyarakat Islam, melampau, Malaysia

Extreme and Fanatic in the Terms of al-Quran and Hadith: Analysis of Understanding from Text

Abstract

Extreme or fanatic are to refer to behaviors or actions beyond the habit. In terms of the al-Quran and hadith, there are several terms that can be attributed to extreme or fanatic purposes. Hence, this article aims to

identify the terms use in the texts of the Quran and the hadith while release the understanding and scope of its use in the text. The analysis uses inductive and deductive approaches to identify and explain the overall meaning of the termination. The study found that the terms in the application of the Quran which refers to extreme or fanatic are Ta'lu (Ghuluw), Ta'taddu (Transcending Limit) and Tatghaw (Transcended Limit). While in the hadith the terms uses are Tanattu' (Extreme Attitude), Tashaddud (Member-weighted), Takalluf (Forced Self-Force) and I'tidā' (Surpassing the Rules of Sharia). The whole term in the Quran and the hadith refers to some form of extremism or extreme attitudes or actions that are extreme in the aspect of worship and its implementation (such as prayer, fasting and praying), extreme in the aspects of muamalah (such as halal and haram aspects related to food and drink, covenant ties, etc.), extreme in the aspect of the creed and extreme in the aspect of sin and reward.

Keywords: *extreme, extremist, fanatic, obsessed, ideology, Islamic community, extremes, Malaysia*

Pendahuluan

Istilah ekstrem atau merujuk kepada maksud melampau adalah merujuk kepada sikap berlebihan dalam mempertahankan kepercayaan dan tindakan yang dilakukan. Sikap ini menunjukkan kepada sikap seseorang yang tidak terbuka untuk menerima pandangan orang lain dan tidak pula merasakan bahawa segala tindakan yang dilakukan itu melampaui batasan atau bercanggah dengan tuntutan asalnya. Keseluruhannya adalah berasaskan kepada mempertahankan apa yang dipercayai. Dalam pada itu juga, terdapat beberapa istilah lain yang boleh dianggap atau diletakkan dalam mewakili sikap ekstrem. Antaranya adalah fanatik, pelampau, taasub, berlebih-lebih atau melampaui batas dan sebagainya lain.

Dalam al-Quran, sikap ekstrem atau melampau ini disebutkan dengan istilah *ghuluw* seperti mana dalam firman Allah SWT pada surah al-Mā'idah ayat 77:

قُلْ يَا أَهْلَ الْكِتَابِ لَا تَغْلُوا فِي دِينِكُمْ غَيْرَ الْحَقِّ وَلَا تَتَّبِعُوا أَهْوَاءَ قَوْمٍ قَدْ ضَلُّوا
مِنْ قَبْلُ وَأَضَلُّوا كَثِيرًا وَضَلُّوا عَنْ سَوَاءِ السَّبِيلِ.

Terjemahan: Katakanlah: “Wahai Ahli Kitab! Janganlah kamu melampau dalam agama kamu secara yang tidak benar, dan janganlah kamu menurut hawa nafsu suatu kaum yang

telah sesat sebelum ini dan telah menyesatkan banyak manusia, dan juga (sekarang) mereka telah tersesat (jauh) dari jalan yang betul.”

Perkataan *ghuluw* tersebut dimaksudkan sebagai melampau-lampau atau bersikap *ekstrem* secara umumnya. Bahkan sikap tersebut juga diistilahkan dengan perkataan lain, iaitu *al-tanaṭṭu'* dan *al-tashdīd*.¹ Al-Qardāwī menyatakan bahawa sikap taasub dan fanatik kepada pendapat sendiri mahupun guru dan kumpulan masing-masing adalah salah satu daripada gejala melampau-lampau. Ia menggambarkan kebekuan fahaman seseorang yang tidak boleh melihat masalah umum.² Ia juga menggambarkan seseorang yang tidak berkemampuan membuka perbincangan untuk membandingkan pendapatnya dengan pendapat pihak-pihak lain bagi mengambil pendapat yang lebih kuat dalil dan alasannya.³

Justeru, daripada sikap ini timbullah individu-individu yang terlalu bersikap fanatik atau ekstrem sehingga melahirkan golongan atau kumpulan yang mendukung ideologi masing-masing dan mempertahankannya atas dasar sikap demikian. Jadi, bagi memahami dengan lebih jelas tentang sikap melampau atau ekstremis ini, perlu kepada huraian dan rujukan dalam perbincangan terhadap teks al-Quran dan hadith Nabi SAW. Oleh itu, artikel ini akan berusaha untuk mengemukakan perbincangan berasaskan kepada rujukan terhadap teks al-Quran dan hadith serta perbincangan ulama mengenai ekstrem atau sikap ekstremis. Perbincangan secara menyeluruh terhadap isu ekstremis ini akan dapat memberikan pencerahan sebenar kepada semua pihak dalam memahami istilah serta skop pemahamannya.

Ekstrem: Konsep dan Pengertian

Dalam *Kamus Dewan Edisi Keempat* ekstrem adalah merujuk kepada maksud “keterlaluan”, “melampau” atau “terlalu sangat”. Manakala istilah “ekstremisme” pula merujuk kepada fahaman

¹ Yusuf al-Qardawi, *Kebangunan Islam di Antara Tentangan dan Ekstremisme*, terj. Muhammad Rivai Batubara (Kuala Lumpur: Angkatan Belia Islam Malaysia, 1984), 17.

² *Kebangunan Islam di Antara Tentangan dan Ekstremisme*, 41.

³ Mohamad Kamil Hj Ab Majid, “Fanatik dan Taksab dalam Islam: Analisis Pandangan al-Qardawi,” *Jurnal Usuluddin* 18 (2003), 27.

atau sikap. Contoh ayat, ekstremisme agama bukan lagi merupakan ancaman terbesar di Malaysia.⁴

Ibn Taymiyyah berpendapat bahawa ekstremisme bermaksud sesuatu yang melampaui batas dengan menambahkan kepada sesuatu sama ada dengan memuji atau mengeji, menolak lebih daripada yang berhak diterima dan sebagainya. Manakala menurut Ibn Hajar, ekstremisme ditakrifkan sebagai berlebih-lebihan dalam sesuatu dan memperketatkan dengan melewati batas⁵. Perkataan ekstremisme, fundamentalisme, revivalisme, Islamisme, radikalisme, ekstremis dan militan atau seumpamanya sentiasa diguna bergantian bagi sesetengah pihak.⁶ Yusuf al-Qaradawi memberi pengertian kepada maksud *taṭarruf al-Dīn* (ekstremis keagamaan) adalah digunakan untuk hal-hal abstrak seperti melampaui batas tengah dalam agama, pemikiran atau perbuatan.

Kemudian, apabila merujuk kepada melampau, istilah ekstrem juga boleh membawa maksud melebihi had dan ketentuan yang sewajarnya, melanggar tata tertib ataupun berlebih-lebih.⁷ Ada juga yang mengaitkan ekstrem atau ekstremis dengan istilah teroris yang dimaksudkan sebagai pengganas. Hal ini dapat difahami bahawa dengan mengaitkan kepada maksud pengganas menggambarkan kepada tindakan golongan itu yang bertindak melampaui atasan yang sepatutnya sehingga ada yang membawa kepada tindakan membunuh, mengebom atau meletupkan tempat awam dan sebagainya.

Pada pandangan pengkaji, terdapat juga istilah lain yang turut dapat dikaitkan dengan sikap ekstrem iaitu taasub dan fanatik. Cumanya, kedua-dua istilah ini mempunyai ciri-ciri yang menunjukkan kepada pengkhususan maksud yang lebih khusus sesuai dengan skop atau batasan penggunaan istilah tersebut.

⁴ Dewan Bahasa dan Pustaka, “ekstreme”, laman sesawang Pusat Rujukan Persuratan Melayu, dicapai 21 Julai 2016. <http://prpm.dbp.gov.my/Search.aspx?k=ekstreme>.

⁵ PKPIM UNISEL, “Pengertian Ekstremisme,” laman sesawang *PKPIM UNISEL*, dicapai pada 22 November 2015, <http://uniselpkpim.blogspot.my/2009/09/pengertian-ekstremisme.html?m=1>.

⁶ Mohd Roslan Mohd Nor, *Kefahaman Islam Semasa di Malaysia: Realiti dan Cabaran (Ekstremisme Rentas Agama dan Tamadun)* (Selangor: Persatuan Ulama’ Malaysia, 2015), 146.

⁷ Dewan Bahasa dan Pustaka, “ekstreme”, laman sesawang Pusat Rujukan Persuratan Melayu, dicapai 21 Julai 2016. <http://prpm.dbp.gov.my/Search.aspx?k=ekstreme>.

Istilah fanatik merujuk kepada *Kamus Dewan* bermaksud terlalu berlebihan kepercayaannya atau keyakinannya terhadap sesuatu ajaran (termasuk politik dan lain-lain) hingga melampaui batas. Fanatik juga merujuk kepada (orang yang) keterlaluan pada sesuatu pegangan atau pendirian (biasanya berkaitan dengan keagamaan).⁸ Disebutkan juga bahawa fanatik adalah seerti dengan kalimah taasub iaitu terlalu kuat pegangannya atau berlebih-lebih keyakinannya pada sesuatu; tegar hati atau dinyatakan juga taasub sebagai kuat pegangan dan keyakinan yang keterlaluan terhadap sesuatu atau seseorang, seerti dengan fanatik.⁹

Kemudian, istilah *fanatisme* pula merujuk kepada satu fahaman atau perilaku yang menunjukkan sikap tarikan terhadap sesuatu secara berlebihan. George Santayana telah mendefinisikan fanatisme sebagai melipatgandakan usaha ada ketika anda lupa tujuan anda.¹⁰ Manakala Winston Churchill menyebutkan bahawa seseorang fanatisme sukar untuk mengubah pola berfikir dan tidak pula akan mengubah haluannya. Boleh dikatakan bahawa seseorang yang fanatik memiliki aturan yang ketat dalam pola berfikirnya dan cenderung tidak mahu mendengarkan pandangan atau idea yang dianggap bertentangan.¹¹

Mohamad Kamil Hj. Abd. Majid dalam tulisan ada menyebutkan bahawa fanatik adalah sama maksud dengan taasub iaitu sikap yang keterlaluan dan melampau dalam sesuatu pegangan atau pendirian yang biasanya berkaitan dengan keagamaan.¹² Sedangkan lawan bagi fanatik dan taasub ialah tasamuh dan toleransi; yang bermaksud lapang dada, luas fikiran

⁸ Dewan Bahasa dan Pustaka, “fanatik”, laman sesawang Pusat Rujukan Persuratan Melayu, dicapai 11 Ogos 2016. <http://prpm.dbp.gov.my/Search.aspx?k=fanatik>

⁹ Dewan Bahasa dan Pustaka, “fanatik”, laman sesawang Pusat Rujukan Persuratan Melayu, dicapai pada 11 Ogos 2016. <http://prpm.dbp.gov.my/Search.aspx?k=fanatik>.

¹⁰ George Santayana, *Life of Reason: Reason in Common Sense* (New York: Charles Scribner's Sons, 1905), 13.

¹¹ George Santayana, *Life of Reason: Reason in Common Sense*, 13.

¹² Mohamad Kamil Hj. Abd. Majid, “Fanatik dan Taksab Kepada Guru,” laman sesawang Darul Kautsar Indeks, <http://www.darul kautsar.net/darul kautsar-net/world/tasawwuf/fanatik-dan-taksab-kepada-guru.html>.

dan sabar.¹³ Bahkan, beliau juga memetik pandangan al-Qarḍāwī yang menyatakan bahawa sikap fanatik dan taasub kepada pandangan sendiri atau kepada guru dan kumpulan masing-masing adalah salah satu daripada gejala melampau-lampau. Sikap ini menggambarkan seseorang yang tidak berkemampuan membuka perbincangan untuk membandingkan pendapatnya dengan pendapat pihak-pihak lain bagi mendapat pendapat yang lebih kuat dalil dan alasannya.¹⁴

Menurut Achmad Mubarak MA pula, fanatik adalah suatu istilah yang digunakan untuk menyebut suatu keyakinan atau suatu pandangan tentang sesuatu yang bersifat positif atau negatif, tidak berasaskan kepada sandaran teori atau mempunyai asas kenyataan teori yang jelas tetapi dianuti atau dipegang dengan cara yang mendalam sehingga sukar untuk dibetulkan atau diubah pandangan tersebut. Fanatisme juga dapat disebut sebagai orientasi dan sentimen yang mempengaruhi seseorang dalam; berbuat sesuatu, menempuh sesuatu atau memberi sesuatu, dalam berfikir dan memutuskan, dalam mempersepsi dan memahami sesuatu, dan dalam merasa.¹⁵

Secara keseluruhannya, dapat difahami bahawa istilah ekstrem atau sikap ekstremis adalah keadaan di mana seseorang yang mempunyai sesuatu kepercayaan dalam dirinya dan merealisasikan apa yang dipercayai itu sekalipun melampaui batasan yang ditetapkan. Maka, akan terbitkan tindakan yang melampau-lampau, berlebih-lebihan, tindakan fanatik, taasub kepada apa yang disokong atau didukung dan sebagainya. Secara umumnya, ekstrem dan sikap ekstremis cenderung kepada tingkah laku negatif berbanding dengan positif.

¹³ Mohamad Kamil Hj. Abd. Majid, "Fanatik dan Taksub Kepada Guru," laman sesawang Darul Kautsar Indeks, <http://www.darulkaulsar.net/darulkaulsar-net/world/tasawwuf/fanatik-dan-taksub-kepada-guru.html>

¹⁴ Muhammad Yusuf al-Qaradawi, *Kebangunan Islam di Antara Tentangan dan Ekstrimisme*, 41.

¹⁵ Achmad Mubarak MA. "Fanatik dan Toleransi", laman sesawang Mubarak Institute, dicapai 25 Julai 2016, <http://mubarak-institute.blogspot.my/2010/12/fanatik-dan-toleransi-oleh-prof-dr.html>. Rujuk juga Dinda Ayu Kusumaningtyas, "Fanatisme dan Radikalisme Agama". (Latihan Ilmiah di Jurusan Sistem Informasi, Sekolah Tinggi Manajemen Informatika dan Komputer, AMIKOM, Yogyakarta, 2011), 5.

Skop dan Metodologi

Artikel ini secara umumnya akan memberikan penekanan terhadap pemahaman bagi istilah ekstrem daripada rujukan teks al-Quran dan hadith-hadith yang berkaitan. Memandangkan istilah ekstrem mempunyai maksud yang luas maka artikel ini akan cuba menumpukan dan membuat pilihan sesuai dengan skop perbincangannya.

Keseluruhannya, analisis terhadap teks al-Quran, hadith dan pandangan para ulama berkaitan berasaskan kepada analisis bersifat induktif dan deduktif. Bagi teks al-Quran dan hadith yang mendatangkan prinsip asas utama maka memerlukan kepada pendekatan induktif supaya dapat dijelaskan berasaskan kepada rujukan kepada pandangan para pentafsir dan pensyarah hadith sehingga segala yang bersifat prinsip yang khusus itu dapat dijelaskan kefahaman yang bersifat lebih luas pemahamannya. Manakala melalui analisis deduktif segala perbincangan yang dikemukakan dalam kalangan ulama dikumpulkan dan dianalisis sehingga dapat disimpulkan kefahaman yang menyeluruh dan bersifat khusus berkaitan dengan tema ekstrem ini. Gabungan antara kedua-dua pendekatan ini akan dapat memberikan penelitian yang jelas berkaitan dengan perbincangan terhadap tema ekstrem tersebut.

Hasil dan Dapatan

Pertama: Ayat al-Quran Berkaitan dengan Ekstrem atau Melampau

Istilah ekstrem dirujuk kepada perkataan Arab, iaitu *ghuluw* yang bermaksud taasub yang melampau dalam sesuatu perkara.¹⁶ Ia juga dirujuk dengan maksud melampaui had sempadan yang dibenarkan. Disebutkan istilah *ghuluw* ini dalam beberapa ayat al-Quran seperti ayat 171 surah al-Nisa' dan surah al-Mā'idah ayat 77. Firman Allah SWT:

يَا أَهْلَ الْكِتَابِ لَا تَغْلُوا فِي دِينِكُمْ وَلَا تَقُولُوا عَلَى اللَّهِ إِلَّا الْحَقَّ.

Al-Nisā' 4:171

¹⁶ "Ghuluw", laman sesawang *al-Ma'ani*, dicapai 3 Febuari 2016, <http://www.almaany.com/ar/dict/ar-ar/%D8%BA%D9%84%D9%88/>

Terjemahan: “Wahai Ahli Kitab! Janganlah kamu melampaui batas dalam agamamu, dan janganlah kamu mengatakan terhadap Allah kecuali yang benar...”

Kemudian, firman Allah SWT:

قُلْ يَا أَهْلَ الْكِتَابِ لَا تَغْلُوا فِي دِينِكُمْ غَيْرَ الْحَقِّ وَلَا تَتَّبِعُوا أَهْوَاءَ قَوْمٍ قَدْ ضَلُّوا مِنْ قَبْلُ وَأَضَلُّوا كَثِيرًا وَضَلُّوا عَنْ سَوَاءِ السَّبِيلِ.

Al-Mā'idah 5:77

Terjemahan: “Katakanlah (Muhammad), wahai Ahli Kitab! Janganlah kamu berlebih-lebihan dengan cara yang tidak benar dalam agamamu. Dan janganlah kamu mengikuti keinginan orang-orang yang telah tersesat dahulu dan (telah) menyesatkan banyak (manusia), dan mereka sendiri tersesat dari jalan yang lurus.”

Terdapat istilah lain yang digunakan untuk menggambarkan *ghuluw* iaitu *ifrāt* dan *tafrīt*, *al-tamaṭṭu'* dan lain-lain lagi. Dalam surah al-Mā'idah, ayat 87 pula, Allah menggunakan istilah “*al-mu'tadīn*” yang merujuk kepada golongan yang melampaui batas. Asal ungkapan tersebut adalah kalimah *i'tidā'* iaitu melampaui ketentuan syariat. Firman Allah SWT:

يَا أَيُّهَا الَّذِينَ آمَنُوا لَا تَحْرَمُوا طَيِّبَاتِ مَا أَحَلَّ اللَّهُ لَكُمْ وَلَا تَعْتَدُوا ۚ إِنَّ اللَّهَ لَا يُحِبُّ الْمُعْتَدِينَ.

Al-Mā'idah 5:87

Terjemahan: “Hai orang-orang yang beriman, janganlah kamu mengharamkan sesuatu yang baik yang telah dihalalkan Allah bagimu, dan jangan pula kamu melampaui batas. Sesungguhnya Allah tidak menyukai orang-orang yang melampaui batas.”

Dalam firman Allah:

وَقَاتِلُوا فِي سَبِيلِ اللَّهِ الَّذِينَ يُقَاتِلُونَكُمْ وَلَا تَعْتَدُوا ۚ إِنَّ اللَّهَ لَا يُحِبُّ الْمُعْتَدِينَ.

Al-Baqarah 2:190

Terjemahan: “Dan perangilah di jalan Allah orang-orang yang memerangi kamu, (tetapi) janganlah kamu melampaui batas, karena sesungguhnya Allah tidak menyukai orang-orang yang melampaui batas.”

Kedua-dua ayat ini terkait rapat dengan keterangan dalam ayat 187 surah al-Baqarah ayat 187 di mana Allah SWT

mempunyai batasan-batasan syariatNya dan larangan kepada setiap hamba untuk melebihi had atau batasan yang ditetapkan itu. Firman Allah SWT:

تِلْكَ حُدُودُ اللَّهِ فَلَا تَعْرُوهَا.

Al-Baqarah 2:187

Terjemahan: “Itulah batasan-batasan hukum Allah, maka janganlah kalian melampauinya.”

Pada ayat dalam surah al-Nisā’, perkataan *ghuluw* ini di ambil dari perkataan *ghala*, *yaghlu* dan secara bahasanya membawa maksud melampaui batas dan disertai juga berlebihan¹⁷. Al-Bukhari dalam kitab Sahihnya berdalilkan dengan surah al-Nisa’ ini dengan ayat yang ditujukan kepada ahli kitab itu adalah dalam bentuk konteks yang umum iaitu selain dari kaum Yahudi dan Nasrani. Oleh itu, umat Islam khususnya tidak dikecualikan daripada maksud ayat ini supaya mereka tidak terjebak dalam perbuatan *ghuluw* yang dilakukan sebelum mereka¹⁸.

Kemudian, al-Quran turut menggunakan istilah lain yang turut merujuk kepada sikap dan tindakan ekstrem iaitu *takalluf* iaitu merujuk kepada maksud memaksa-maksa diri. Ia merujuk kepada memaksa diri dengan perkara yang tidak dapat ditanggung, sesuai dengan ciri agama Islam yang mudah serta tidak membebankan. Firman Allah SWT:

قُلْ مَا أَسْأَلُكُمْ عَلَيْهِ مِنْ أَجْرٍ وَمَا أَنَا مِنَ الْمُتَكَلِّفِينَ.

Ṣad 38:86

Terjemahan: “Katakanlah (hai Muhammad): “Aku tidak meminta upah sedikitpun padamu atas dakwahku dan bukanlah aku termasuk orang-orang yang mengada-adakan.”

Justeru, kesemua istilah tersebut dapat dikatakan bahawa menggambarkan kepada sikap melampaui, membebankan, melebihi had dan sempadan yang dibenarkan. Dengan itu, *ghuluw* bermaksud melampaui had dan terkeluar daripada sempadan yang ditetapkan.¹⁹

¹⁷ Muḥammad ibn Mukarram ibn ‘Alī ibn Aḥmad Ibn Manẓūr, *Lisān al-‘Arab* (Kaherah: Dār al-Ma’ārif, t.t.), 9:113.

¹⁸ Ibn Hajar al-Asqalani, *Fathul Bari: Penjelasan Kitab Shahih al-Bukhari*, terj Amir al-Din, ed. Abu Rania (Jakarta: Pustaka Azzam, 2011), 6: 233.

¹⁹ Ibn Manẓūr, *Lisan al-Arab*, bil. 37, 329, entri “*ghala*”.

Manakala golongan ekstremis pula adalah merujuk kepada orang yang tidak mempedulikan apa-apa had di dalam setiap pemikiran ucapan dan tindakannya. Akan tetapi, di dalam setiap perkara itu terdapat had yang telah ditetapkan oleh Allah SWT. Seperti terdapat banyak firman Allah SWT di dalam al-Quran yang mengingatkan tentang aturan Allah (*hudūd Allāh*) dan melampaui had yang telah Allah tetapkan adalah suatu pengkhianatan, kafir, munafik, jahil dan zalim.

الْأَعْرَابُ أَشَدُّ كُفْرًا وَنِفَاقًا وَأَجْدَرُ أَلَّا يَعْلَمُوا حُدُودَ مَا أَنْزَلَ اللَّهُ عَلَىٰ رَسُولِهِ ۗ
وَاللَّهُ عَلِيمٌ حَكِيمٌ.

Al-Tawbah 9:97

Terjemahan: Orang-orang Arab lebih keras kufurnya dan sikap munafiknya, dan sangatlah patut mereka tidak mengetahui batas-batas (dan hukum-hukum Syarak) yang diturunkan oleh Allah kepada RasulNya. Dan (ingatlah) Allah Maha Mengetahui, lagi Maha Bijaksana.

Firman Allah:

التَّائِبُونَ الْعَابِدُونَ الْحَامِدُونَ السَّائِحُونَ الرَّاكِعُونَ السَّاجِدُونَ الْأَمْرُونَ بِالْمَعْرُوفِ
وَالنَّاهُونَ عَنِ الْمُنْكَرِ وَالْحَافِظُونَ لِحُدُودِ اللَّهِ ۗ وَبَشِّرِ الْمُؤْمِنِينَ.

Al-Tawbah 9:112

Terjemahan: (Mereka itu ialah): orang-orang yang bertaubat, yang beribadat, yang memuji Allah, yang mengembara (untuk menuntut ilmu dan mengembangkan Islam), yang rukuk, yang sujud, yang menyuruh berbuat kebaikan dan yang melarang daripada kejahatan, serta yang menjaga batas-batas hukum Allah. Dan gembirakanlah orang-orang yang beriman (yang bersifat demikian).

Selain daripada itu, *ghuluw* juga bermaksud menghantar sesuatu seperti kejahatan dan penyakit kepada orang lain.²⁰ Hal ini seperti apa yang telah dilakukan oleh golongan ini kepada agama supaya bercampur di dalam agama antara kebenaran dan kepalsuan sehingga ke tahap kebenaran tidak lagi diiktiraf. Dan kesannya, ramai yang sesat berikutan daripada keinginan yang

²⁰ Md Asham bin Ahmad. "Moderation in Islam: A Conceptual Analysis of Wasatiyyah", *TAFHIM: IKIM Journal of Islam and the Contemporary World* 4, (2011): 29-46, 43.

tidak telus itu berbanding dengan ilmu pengetahuan yang sebenar.²¹

Oleh yang demikian, dapat dikatakan bahawa perkataan *ghuluw* ini sinonim dengan perkataan ekstrem yang lebih difahami pada hari ini. Menurut *Kamus Dewan* ekstrem bermaksud keterlaluan atau melampau.²² Manakala ekstremis adalah orang yang melampau atau orang (golongan) yang sikapnya (pendiriannya) dalam sesuatu hal (seperti politik) melampau batas kesederhanaan.²³

Walau bagaimanapun, istilah *ghuluw* atau ekstrem juga turut dilihat dari sudut memahami fikiran mereka yang terlibat secara langsung dan mereka yang menyokong tindakan ekstremis dan keganasan agama itu, pembentukan imaginasi agama pada pelaku dan pergerakan ahli ekstremisme agama.²⁴ Ia tidak tertumpu hanya kepada pelaku ekstremis agama ini semata-mata sahaja.

Jadual 1.0: Istilah Ekstrem dan Skop Maknanya dalam al-Quran

Bil	Nama surah dan nombor ayat	Istilah dalam al-Quran	Maksud kalimah/ batasan makna
1	al-Nisā' 4:171	<i>Al-Ghuluw</i>	Sikap melampau, ekstrem, fanatik, membebankan, melebihi had.
2	al-Mā'idah 5:77		
3	al-Mā'idah 5:87	<i>Al-Mu'tadīn</i>	Orang yang bersikap melampaui batas
4	Al-Baqarah (2):190		
5	Şad 38:86	<i>Takalluf / al-Mutakallafīn</i>	Memaksa-maksa diri/ Sikap membebani diri
6	Al-Baqarah 2:187	Melampaui Had / <i>Hudūd</i>	Tindakan yang melampaui batas syarak; melampaui had yang ditentukan
7	al-Tawbah 9:97		
8	al-Tawbah 9:112		

Sumber: Hasil Analisis Pengkaji

²¹ Md Asham bin Ahmad. "Moderation in Islam: A Conceptual Analysis of Wasatiyyah", 43.

²² Dewan Bahasa dan Pustaka, "ekstreme", laman sesawang *Pusat Rujukan Persuratan Melayu*, dicapai 4 Febuari 2016, <http://prpm.dbp.gov.my/Search.aspx?k=ekstreme>

²³ Dewan Bahasa dan Pustaka, "ekstreme", laman sesawang *Pusat Rujukan Persuratan Melayu*, dicapai 4 Febuari 2016, <http://prpm.dbp.gov.my/Search.aspx?k=ekstreme>

²⁴ Mansor Mohd Noor. "Memahami dan Mengurus Ekstremeisme Agama di Malaysia", *Journal of Ethics, Legal and Governance* 1 (2005), 53.

Hadith-hadith Berkaitan dengan Ekstrem atau Melampau

Kemudian, dalam perbincangan terhadap hadith-hadith daripada *al-Kutub al-Sittah* istilah ekstrem dapat dirujuk kepada beberapa istilah dan skop maknanya yang dijelaskan oleh Nabi SAW.

Jadual 1.0: Taburan Hadith Ekstrem atau *al-Ghuluw* dalam *al-Kutub al-Sittah*

Bil.	Tema dan <i>atraf</i> Hadith	Sumber dan Bilangan*					
		S B	S M	J T	S D	S N	S I
Tema I	Larangan Melampauai Batas, Ekstrem atau Memberatkan Sesuatu						
1.	هَلَكَ الْمُتَنَطِّعُونَ قَالَهَا ثَلَاثٌ	-	1	-	1	-	-
2.	كُنِينَا عَنِ التَّكْلِيفِ	1	-	-	-	-	-
3.	وَإِيَّاكُمْ وَالْغُلُوَّ فِي الدِّينِ فَإِنَّمَا أَهْلَكَ مَنْ كَانَ قَبْلَكُمْ الْغُلُوَّ فِي الدِّينِ	-	-	-	-	1	1
Tema II	Larangan Bersikap Ghuluw Kerana Menyalahi Fitrah dalam Beribadah	S B	S M	J T	S D	S N	S I
4.	جَاءَ ثَلَاثُهُ زَهْطًا إِلَى بُيُوتِ أَزْوَاجِ النَّبِيِّ صَلَّى اللَّهُ عَلَيْهِ وَسَلَّمَ يَسْأَلُونَ عَنْ عِبَادَةِ النَّبِيِّ صَلَّى اللَّهُ عَلَيْهِ وَسَلَّمَ	1	1	-	-	1	-
5.	مَنْ شَهِدَ أَنْ لَا إِلَهَ إِلَّا اللَّهُ وَخَدَهُ لَا شَرِيكَ لَهُ، وَأَنَّ مُحَمَّدًا عَبْدُهُ وَرَسُولُهُ، وَأَنَّ عِيسَى عَبْدُ اللَّهِ وَرَسُولُهُ، وَكَلِمَتُهُ أَلْقَاهَا إِلَى مَرْثَمٍ وَرُوحٌ مِنْهُ، وَالْجَنَّةُ حَقٌّ، وَالنَّارُ حَقٌّ، أَدْخَلَهُ اللَّهُ الْجَنَّةَ عَلَى مَا كَانَ مِنَ الْعَمَلِ.	1	-	-	-	-	-
Tema III	Larangan Bersikap Taasub Kepada Suatu Kumpulan atau Mengajak Kepadanya	S B	S M	J T	S D	S N	S I
6.	مَنْ خَرَجَ مِنَ الطَّاعَةِ، وَفَارَقَ الْجَمَاعَةَ فَمَاتَ، مَاتَ مِيتَةً جَاهِلِيَّةً، وَمَنْ قَاتَلَ تَحْتَ رَايَةٍ عَمِيَّةٍ يَعْصِبُ لِعَصْبَةٍ، أَوْ يَدْعُو إِلَى عَصْبَةٍ، أَوْ يَنْصُرُ عَصْبَةً،	-	2	-	-	1	-

Bil.	Tema dan <i>atraf</i> Hadith	Sumber dan Bilangan*					
Tema IV	Larangan Solat Sunat Berlebihan & Ibadah Fardu Sebagai Had Minimum dalam Ibadah Solat	S B	S M	J T	S D	S N	S I
7.	دَخَلَ النَّبِيُّ صَلَّى اللَّهُ عَلَيْهِ وَسَلَّمَ فَإِذَا حَبْلٌ مَمْدُودٌ بَيْنَ السَّارِيَتَيْنِ فَقَالَ : مَا هَذَا الْحَبْلُ؟	1	1	-	1	1	1
8.	عَلَيْكُمْ مَا تُطِيعُونَ مِنَ الْأَعْمَالِ، فَإِنَّ اللَّهَ لَا يَمَلُّ حَتَّى تَمَلُّوا	2	-	-	-	-	-
9.	مَا زَالَ بِكُمْ الَّذِي رَأَيْتُ مِنْ صَنِيعِكُمْ حَتَّى خَشِيتُ أَنْ يُكْتَبَ عَلَيْكُمْ، وَلَوْ كُتِبَ عَلَيْكُمْ مَا قُمْتُمْ بِهِ،	2	-	-	-	-	-
10.	إِنْ كَانَ رَسُولُ اللَّهِ صَلَّى اللَّهُ عَلَيْهِ وَسَلَّمَ لَيَدْعُ الْعَمَلَ وَهُوَ يُحِبُّ أَنْ يَعْمَلَ بِهِ خَشِيَةَ أَنْ يَعْمَلَ بِهِ النَّاسُ فَيُفْرَضَ عَلَيْهِمْ.	1	-	-	-	-	-
Tema V	Larangan Berpuasa atau Menyambung Puasa Sehingga Membebankan Diri serta Ibadah Puasa Sunat Nabi Dawud AS adalah Had Maksimum Dalam Ibadah Puasa	S B	S M	J T	S D	S N	S I
11.	نَهَى رَسُولُ اللَّهِ صَلَّى اللَّهُ عَلَيْهِ وَسَلَّمَ عَنِ الْوَصَالِ فِي الصَّوْمِ،	1	-	-	-	-	-
12.	أُخْبِرَ رَسُولُ اللَّهِ صَلَّى اللَّهُ عَلَيْهِ وَسَلَّمَ أَنِّي أَقُولُ وَاللَّهِ لَا صُومَ النَّهَارِ وَلَا قَوْمَ اللَّيْلِ مَ عَشْتُ، فَقُلْتُ لَهُ : قَدْ قُلْتُهُ بِأبي أَنْتَ وَأُمِّي. قال : فَإِنَّكَ لَا تَسْتَطِيعُ ذَلِكَ فَصُمْ وَأَفْطِرْ، وَتَمَّ وَتَمَّ، وَصُمْ مِنَ الشَّهْرِ ثَلَاثَةَ أَيَّامٍ،	1	-	-	-	-	-

Bil.	Tema dan <i>atraf</i> Hadith	Sumber dan Bilangan*					
13.	لَيْسَ الْبِرُّ أَنْ تَصُومُوا فِي السَّنَةِ	1	1	1	1	1	1
14.	فَصُمْ صَوْمَ دَاوُدَ عَلَيْهِ السَّلَامُ، كَانَ يَصُومُ يَوْمًا وَيُفْطِرُ يَوْمًا وَلَا يَبْدُلُ إِذَا لَاقَى	6	6	-	1	9	1
Tema VI	Larangan Berdoa Secara Paksa atau Berlebihan	S B	S M	J T	S D	S N	S I
15.	سَبِّكَوْنٌ فِي هَذِهِ الْأُمَّةِ قَوْمٌ يَعْتَدُونَ فِي الطُّهُورِ وَالِدُعَاءِ	-	-	-	1	-	1
16.	لَنْ يُدْخِلَ أَحَدًا عَمَلُهُ الْجَنَّةَ « قَالُوا: وَلَا أَنْتَ يَا رَسُولَ اللَّهِ؟ قَالَ: " لَا، وَلَا أَنَا، إِلَّا أَنْ يَتَّعَمِدَ عَلَى اللَّهِ بِفَضْلِ وَرَحْمَةٍ، فَسَدَّدُوا وَقَارِبُوا، وَلَا يَتَمَنَّيَنَّ أَحَدُكُمْ الْمَوْتَ	1	-	-	-	-	-
Tema VII	Larangan Memuji Nabi Berlebihan	S B	S M	J T	S D	S N	S I
17.	لَا تُطْرَبُونِي كَمَا أُطْرِبَتِ النَّصَارَى ابْنَ مَرْيَمَ فَإِنَّمَا أَنَا عَبْدُهُ فَعْمَلُوا عَبْدَ اللَّهِ وَرَسُولَهُ	2	-	-	-	-	-
Tema VIII	Larangan Mengada-adakan Sesuatu Baharu Berkaitan Agama	S B	S M	J T	S D	S N	S I
18.	مَنْ أَحَدَثَ فِي أَمْرِنَا هَذَا مَا لَيْسَ مِنْهُ فَهُوَ رَدٌّ.	1	1	-	1	-	1
Tema IX	Agama Tidak Memberatkan/ Membebankan	S B	S M	J T	S D	S N	S I
19.	إِنَّ الدِّينَ يُسْرٌ، وَلَنْ يُشَادَّ الدِّينَ أَحَدٌ إِلَّا غَلَبَهُ،	2	-	-	-	1	-

*SB: Ṣaḥīḥ al-Bukhārī; SM: Ṣaḥīḥ Muslim; JM: Jāmi' al-Tirmīdhī; SD: Sunan Abū Dāwūd; SN: Sunan al-Nasā'ī; SI: Sunan Ibn Mājah

Sumber: Hasil Analisis daripada *al-Kutub al-Sittah*

Daripada keseluruhan hadith ini, perbincangan hanya memfokuskan kepada aspek teori dan pemahaman secara umum terhadap ekstrem yang tidak melibatkan kepada penekanan terhadap aspek contoh dan bentuk-bentuk ekstrem. Jadi, daripada keseluruhan itu dalam *al-Kutub al-Sittah*, terdapat lima hadith

yang menjadi dasar perbincangan utama dari sudut pemahaman berkaitan dengan ekstrem atau melampau. Kelima-lima hadith itu dapat dibahagikan kepada tiga tema atau topik utama iaitu:

Pertama: Larangan Melampaui Batas, Ekstrem atau Memberatkan Sesuatu

Hadith 1: Hadith Larangan Menjadi Orang yang Melampaui Batas (*al-Mutaṭṭi'ūn*)

حَدَّثَنَا أَبُو بَكْرِ بْنُ أَبِي شَيْبَةَ حَدَّثَنَا حَفْصُ بْنُ غِيَاثٍ وَيَحْيَى بْنُ سَعِيدٍ عَنْ ابْنِ جُرَيْجٍ عَنْ سُلَيْمَانَ بْنِ عَتِيقٍ عَنْ طَلْقِ بْنِ حَبِيبٍ عَنْ الْأَحْنَفِ بْنِ قَيْسٍ عَنْ عَبْدِ اللَّهِ قَالَ قَالَ رَسُولُ اللَّهِ صَلَّى اللَّهُ عَلَيْهِ وَسَلَّمَ هَلِكُ الْمُتَمَتِّعُونَ قَالَهَا ثَلَاثًا.

Terjemahan : “Telah menceritakan kepada kami Abū Bakar bin Abī Shaybah telah menceritakan kepada kami Hafṣ bin Ghiyath dan Yaḥyā bin Sa‘īd dari Ibn Jurayj dari Sulaymān bin ‘Aṭīq dari Ṭalq bin Ḥabīb dari Al-Ahnaf bin Qays dari ‘Abd Allāh dia berkata; “Rasulullah SAW telah bersabda: “Celakalah orang-orang yang suka melampaui batas.” (Beliau mengucapkannya tiga kali).²⁵

Dalam hadith ini, ungkapan *halaka al-mutaṭṭi'ūn* yang bermaksud: “*celakalah orang-orang yang suka melampaui batas,*” yang bermaksud golongan yang ekstremis. Golongan ekstrem ini dibicarakan sebagai orang-orang yang mengkaji sesuatu dan kemudiannya mereka bersikap ekstremis terhadap apa yang dikajinya. Golongan ini adalah orang yang melampaui batas dalam percakapan dan perbuatan. Dikatakan bahawa golongan ini apabila dia makan kemudian dia akan mengembalikannya semula, iaitu ayat ini bermaksud orang yang ekstremis ini adalah seorang yang mengkhianati prinsipnya sendiri, serta melampaui batas (ekstrem) iaitu dia membohongi sesuatu fakta apabila mendalami dan

²⁵ Hadith riwayat Muslim, Kitab al-‘Ilm, Bāb Halaka al-Mutaṭṭi’ūn, no.hadith 6784, dan. Sunan Abū Dāwūd, Kitāb al-Sunnah, Bab fī luzūmi al-Sunnah, no.hadith 4608. Rujuk Muslim bin al-Ḥajjāj Abu Husain al-Qushairi al-Naysābūrī, “Ṣaḥīḥ Muslim”, dalam *Mawsū‘at al-Ḥadīth al-Sharīf: al-Kutub al-Sittah*, ed. Ṣalīḥ bin ‘Abd al- ‘Aziz Al al-Shaykh (Riyadh: Dār al-Salām, 2000) 1143 dan lihat Abū Dāwūd Sulaymān bin al-Ash’ath bin Ishāq al-Azīdī al-Sijistānī, “Sunan Abū Dāwūd”, dalam *Mawsū‘at al-Ḥadīth al-Sharīf: al-Kutub al-Sittah*, ed. Ṣalīḥ bin ‘Abd al- ‘Aziz Al al-Shaykh (Riyadh: Dār al-Salām, 2000), 1561.

mempelajari sesuatu perkara. Dalam hadith ini, telah dinyatakan larangan supaya menghindari dari perbuatan *tanattu'*, *tashaddud* iaitu sikap mengada-adakan.²⁶ Menurut al-Khattabi, *al-mutanaṭṭi'ūn* ini adalah mereka yang suka mengada-adakan dalam perkara dan para ahli kalam menyatakan bahawa perkara yang tidak tercapai oleh akal atau tidak logik termasuk dalam perbuatan melampau batas. Perkataan *thalāth marrāt* bermaksud perkataan ekstrem ini telah ditegaskan dan diulang sebanyak tiga kali.²⁷

Hadith mengenai larangan ini telah diucapkan oleh baginda Rasulullah SAW sebanyak tiga kali pada perkataan *halaka al-mutanaṭṭi'ūn*, dan ia menunjukkan bahawa Rasulullah SAW sangat tidak menyukai dengan perbuatan ini dan mencela bagi sesiapa yang melakukannya. Golongan yang ekstrem dalam agama kebiasaannya akan berkata mengenai Allah SWT tanpa hak dan membicarakan tentang hal-hal agama tanpa ilmu dan sehingga akhirnya yang akan menyesatkan diri sendiri beserta orang lain kerana sikap dan perbuatan *ghuluw* ini adalah antara penyebab kepada penyimpangan dalam agama, sikap dan perbuatan.

Hadith 2: Hadith Larangan Membebani Diri (*al-Takalluf*)

عن أنس قال : كُنَّا عِنْدَ عُمَرَ فَقَالَ : حُيِّنَا عَنِ التَّكَلُّفِ.

Terjemahan: Dari Anas beliau berkata, “Kami pernah berada di sisi Umar, maka beliau berkata: “Kita dilarang membebani diri.”²⁸

Al-Bukhārī telah menyatakan berkenaan hadith ini secara ringkas. Beliau meletakkan hadith di dalam bab *Mā Yukrah min Kathrah al-Su'āl wa Takalluf mā lā Ya'nīh* dan mengaitkan bab ini dengan ayat 101 surah al-Mā'idah, firman Allah SWT:

²⁶ Mūsā Syāhīn Lashīn, *Fath al-Mu'īn Sharh Ṣaḥīḥ Muslim* (Kaherah: Dār al-Syuruq, 2002), 10:214.

²⁷ Abī Tāyib Muḥammad Shams al-Ḥaq, *Awn al-Ma'būd Sharh Sunan Abī Dāwūd*, ed. 'Abd al-Raḥman Muḥammad 'Uthmān (Madinah: Maktabah al-Salāfiyah, 1968), 12:362.

²⁸ Hadith riwayat al-Bukhārī, *Kitāb al-I'tisām bi al-Kitāb wa Sunnah*, Bāb banyak bertanya dan membebani diri dengan hal yang tidak penting yang dimakruhkan, no.hadith 7293. Abū 'Abd Allāh Muḥammad bin Ismā'īl al-Bukhārī, “Ṣaḥīḥ al-Bukhārī”, dalam *Mawsū'at al-Ḥadīth al-Sharīf: al-Kutub al-Sittah*, ed. Ṣāliḥ bin 'Abd al-'Azīz Al al-Shaykh (Riyadh: Dār al-Salām, 2000), 607.

لَا تَسْأَلُوا عَنْ أَشْيَاءٍ إِنْ تُبَدَّ لَكُمْ تَسْؤُكُمْ.

Terjemahan: “Janganlah kamu bertanya (kepada Nabi) perkara-perkara yang jika diterangkan kepada kamu akan menyusahkan (membebani) kamu.”

Jelas daripada perletakkan al-Bukhārī dalam bab tersebut bagi menggambarkan dan menjelaskan tentang larangan bertanya sesuatu yang akhirnya akan memberi bebanan atau menyusahkan diri yang bertanya tersebut. Ia juga berkait rapat dengan ayat tersebut. Dalam bab ini juga al-Bukhārī menghimpunkan dengan lapan lagi hadith yang keseluruhannya menjelaskan lagi berkaitan dengan pertanyaan yang banyak dalam hal yang tidak perlu sehingga akhirnya membebani diri sendiri.

Manakala al-Humaydī telah menyebutkan bahawa dalam riwayat lain dari Thābit, dari Anas:

أَنَّ عُمَرَ قَرَأَ: (وَفَاكِهَةً وَأَبًّا) فَقَالَ: مَا الْأَبُّ؟ ثُمَّ قَالَ: مَا كُفَلْنَا أَوْ قَالَ مَا أُمِرْنَا بِهَذَا.

Terjemahan: “Bahawa Umar membaca, “*wa fākihah wa abbā*.” Maka beliau berkata, “Apakah itu *abbā*?” Umar kemudian menjawab, “kita tidak dibebani – atau berkata – kita tidak diperintahkan terhadap hal ini.”²⁹

Dalam hadith ini telah menyatakan larangan berkenaan untuk membebani diri sendiri, ia menunjukkan para sahabat dilarang untuk membebani diri mereka dengan perkataan *’umirnā* iaitu kami diperintahkan atau perkataan *nuhīnā* bermaksud kami dilarang, dan keduanya membawa hukum yang sama dengan dinisbahkan langsung kepada Rasulullah SAW, walaupun periwayatannya tidak menisbahkan secara terus atau terang-terangan kepada Nabi SAW, namun ianya cukup untuk menegaskan maksud dari hadith ini supaya sahabat dan selainnya tidak mengamalkan sikap membebani diri dalam setiap perkara. Oleh sebab itu, hadith ini telah dibatasi dengan perkataan *nuhīnā* ‘*an al-takalluf*.³⁰ Perbuatan membebani diri mempunyai maksud yang sama dengan perbuatan ekstrem, dan sama ada berkaitan ibadah ataupun hal lainnya. Sikap membebani diri ini boleh

²⁹ Ibn Hajar al-Asqalani, *Fathul Bari: Penjelasan Kitab Shahih al-Bukhari*, 36:91.

³⁰ Ibn Hajar al-Asqalani, *Fathul Bari: Penjelasan Kitab Shahih al-Bukhari*, 95.

mengundang kebinasaan pada diri akhirnya. Pada hadith lain pula, Nabi SAW menyuruh agar manusia melaksanakan perintah sesuai dengan kemampuan diri. Daripada Abi Hurayrah RA daripada Nabi SAW bersabda:

دَعُونِي مَا تَرَكْتُمْ، فَإِنَّمَا هَلَكَ مَنْ كَانَ قَبْلَكُمْ سَأَلْتُمْ وَاجْتَلَفْتُمْ عَلَيَّ
أَنْبِيَائِهِمْ، فَإِذَا نَهَيْتُكُمْ عَنْ شَيْءٍ فَاجْتَنِبُوهُ، وَإِذَا أَمَرْتُكُمْ بِشَيْءٍ فَأَتُوا مِنْهُ مَا
اسْتَطَعْتُمْ.

Terjemahan: “Tinggalkan apa yang telah aku tinggalkan kepada kamu. Sesungguhnya binasanya orang-orang sebelum kamu adalah kerana mereka banyak bertanya dan banyak perselisihan (penentangan) terhadap para nabi mereka. Maka, apabila aku melarang (menegah) sesuatu akan jauhilah ia, dan apabila aku perintahkan kamu dengan sesuatu perintah, lakukanlah sesuai dengan kemampuan kamu.”³¹

Hadith ini menunjukkan bahawa supaya setiap apa yang dilarang oleh Rasulullah SAW perlu ditinggalkan seluruhnya kecuali terdapat keuzuran yang membolehkannya. Disebutkan juga dalam hadith “Sesungguhnya binasanya orang-orang sebelum kamu adalah kerana mereka banyak bertanya dan banyak perselisihan (penentangan) terhadap para nabi mereka,” iaitu disebabkan pertanyaan yang dikemukakan terhadap sesuatu yang tidak diharamkan pada mulanya, lalu diharamkan kerana pertanyaan yang mendalam sehingga membebankan diri. Justeru itu, perlunya untuk menjauhi semua larangan Rasulullah SAW dan apa yang dilarang oleh Allah SWT jika sesuatu larangan tersebut menunjukkan haram bukan makruh.

Hadith ini juga menyuruh sesiapa yang tidak mampu untuk melakukan perbuatan yang diperintahkan secara keseluruhan, cukuplah hanya melaksanakan sebahagiannya mengikut kemampuan. Allah SWT tidak membebani seseorang kecuali mengikut kadar kemampuannya menunjukkan agama Islam yang mudah.³² Sesuai dengan firman Allah SWT pada ayat 285, surah

³¹ Hadith riwayat al-Bukhārī, Kitāb al-I‘tiṣām bi al-Kitāb wa Sunnah, Bāb al-Iqtidā’i bi Sunan Rasul SAW, no.hadith 7288. Lihat al-Bukhārī, “Ṣaḥīḥ al-Bukhārī”, dalam *Mawsū‘at al-Ḥadīth al-Sharīf*, 607.

³² Marwan Hadidi, S.PdI, Artikel: Perintah yang Disesuaikan dengan Kemampuan (Jakarta: Yayasan Pendidikan Islam al-Atsary, 2014), 23.

al-Baqarah yang bermaksud: “Allah tidak memberati seseorang melainkan apa yang terdaya olehnya.”

Hadith 3: Hadith Larangan Sikap Berlebih-lebihan (*al-Ghuluw*) dalam Agama yang Membinasakan Umat Sebelumnya.

عَنْ أَبِي الْعَالِيَةِ قَالَ قَالَ ابْنُ عَبَّاسٍ قَالَ لِي رَسُولُ اللَّهِ صَلَّى اللَّهُ عَلَيْهِ وَسَلَّمَ
عَدَاةَ الْعَقَبَةِ وَهُوَ عَلَى رَاحِلَتِهِ هَاتِ الثُّطُ لِي فَلَقَطْتُ لَهُ حَصَبَاتٍ هُنَّ حَصَى
الْحَذْفِ فَلَمَّا وَضَعْتُهُنَّ فِي يَدِهِ قَالَ بِأَمْثَالِ هَؤُلَاءِ وَإِيَّاكُمْ وَالْعُلُوُّ فِي الدِّينِ فَإِنَّمَا
أَهْلَكَ مَنْ كَانَ قَبْلَكُمْ الْعُلُوُّ فِي الدِّينِ.

Terjemahan: “Dari Abū Al-‘Āliyah, berkata; Ibn ‘Abbās berkata; Rasulullah SAW bersabda kepadaku pada pagi hari di ‘Aqabah dan baginda berada di atas kenderaannya: "Ambilkan untukku," lalu aku mengambilkan beberapa batu kecil untuk baginda iaitu batul untuk melontar. Ketika aku meletakkan di tangan baginda, lalu baginda bersabda dengan memberi misalan batu-batu kecil itu: "Janganlah kamu berlebih-lebihan dalam agama, kerana sesungguhnya yang telah membinasakan orang-orang sebelum kalian adalah sikap berlebih-lebihan (*ghuluw*) dalam agama."³³

Hadith ini diriwayatkan oleh al-Nasā’ī dan Ibn Mājah serta tidak diriwayatkan oleh al-Bukhārī dan Muslim. Walaupun demikian, al-Bukhārī telah meletakkan satu bab yang di dalam kitabnya, membicarakan tentang *ghuluw* (melampau) iaitu pada *Kitab al-I’tisām bi al-Kitāb, Bab Mā Yukrah min al-Ta’ammūq wa al-Tanāzu’ fī al-‘Ilm wa al-Ghuluww fī al-Dīn wa al-Bida’* (Bab Perkara yang Dibenci iaitu Mendalami (Bertanya Secara Mendalam) dan Berbalah dalam Ilmu dan Melampau dalam

³³ Hadith riwayat al-Nasā’ī, *Kitab Manāsik al-Hāj, Bāb al-Tiqat al-Hasa*, no.hadith 3059, dan Sunan Ibn Mājah, *Kitab Manāsik al-Hāj, Bāb kadar kerikil untuk lemparan*, no.hadith 3029. Rujuk Abū ‘Abd al-Rahman Ahmad bin Shu‘ayb bin ‘Alī al-Nasā’ī, “Sunan al-Nasā’ī, dalam *Mawsū‘at al-Hadīth al-Sharīf: al-Kutub al-Sittah*, ed. Šālih bin ‘Abd al-‘Aziz Al al-Shaykh (Riyadh: Dār al-Salām, 2000), 2284 dan Abū ‘Abd Allāh Muḥammad bin Yazīd al-Qazwaynī, “Sunan Ibn Mājah”, dalam *Mawsū‘at al-Hadīth al-Sharīf: al-Kutub al-Sittah*, ed. Šālih bin ‘Abd al-‘Aziz Al al-Shaykh (Riyadh: Dār al-Salām, 2000), 2658.

Beragama Serta (Perbuatan) Bidaah). Lalu dikaitkan dengan ayat 171 surah al-Nisā’:

يَا أَهْلَ الْكِتَابِ لَا تَغْلُوا فِي دِينِكُمْ وَلَا تَتَّبِعُوا عَلَى اللَّهِ إِلَّا الْحَقَّ.

Terjemahannya: “Wahai Ahli kitab (Yahudi dan Nasrani)! Janganlah kamu melampau batas dalam perkara agama kamu, dan janganlah kamu mengatakan sesuatu terhadap Allah melainkan yang benar.”

Badr al-Dīn al-‘Aynī menyebutkan bahawa pada *tarjamah al-Bāb* bagi Ṣaḥīḥ al-Bukhārī itu menjelaskan bahawa apa yang dibenci daripada mendalami (perbuatan bertanya secara terlalu mendalam) iaitu bersangatan dalam sesuatu perkara sehingga melampau had (yang ditetapkan). Manakala *al-Tanāzu‘* (Berbalah) dalam ilmu iaitu memberi maksud saling bertengkar pada ilmu ketika berlaku khilaf (perselisihan pandangan) pada suatu hukum apabila tidak jelas dalilnya. Manakala *al-Ghuluw* itu merujuk kepada maksud melampau had.³⁴ Menurut al-Kirmānī, *al-Ghuluw* (melampau batas) adalah lebih atas (atau lebih mendalam) berbanding *al-Ta‘ammuq*. Lalu al-‘Aynī mengaitkan dengan hadith yang dibincangkan di atas. Beliau memberikan contoh seperti perbincangan berkaitan sifat *rububiyyah* sehingga menimbulkan perbalahan daripada perbalahan syaitan yang membawa kepada terkeluar daripada kebenaran yang sebenar. Manakala sifat *ghuluw* pada fikrah (pemikiran) yang memikirkan tentang ketuhanan sehingga membawa kepada menjadikan tuhan (yakni Allah) tiga (iaitu mensyirikkan Allah SWT). Demikian dimaksudkan bahawa sifat *ghuluw* (melampau) ini membawa kesan buruk yang besar. Sedangkan *al-Bida‘* (bidaah) adalah merujuk kepada sesuatu yang tidak ada asal daripada *al-Kitāb* (yakni al-Quran) dan *al-Sunnah* atau dikatakan juga menzahirkan atau mengadakan sesuatu yang tidak ada pada zaman Nabi SAW dan tidak pula ada pada zaman para Sahabat RA.³⁵

Demikian juga Ibn Hajar yang menyebutkan tentang hal yang sama seperti disebutkan oleh al-‘Aini. Beliau juga menyatakan *al-Ghuluw* adalah bersangatan dalam sesuatu dan melampau

³⁴ Badr al-Dīn Abū Muḥammad Maḥmūd bin Aḥmad al-‘Aynī, *‘Umdah al-Qārī Sharḥ Ṣaḥīḥ al-Bukhārī*, ed. ‘Abd Allāh Maḥmūd Muḥammad ‘Umar, (Beirut: Dār al-Kutub al-‘Ilmiyyah, 2001), 35:404.

³⁵ Al-‘Aynī, *‘Umdah al-Qārī Sharḥ Ṣaḥīḥ al-Bukhārī*, 35:404.

terhadapnya sehingga melampaui had (batasan) yang telah ditetapkan dan ia seumpama maksud *al-Ta'ammuq*.³⁶ Lalu beliau juga mengaitkan dengan hadith yang dibincangkan ini dan menyatakan bahawa hadith ini mencontohkan perbuatan melontar jamrah oleh Nabi SAW. Jadi, dapat difahami daripada hadith, Nabi SAW telah meminta agar Ibn 'Abbās mengutip batu-batu yang kecil bagi tujuan untuk melaksanakan rukun melontar jamrah. Disebutkan dengan batu yang kecil itu sesuai dengan keadaan sebahagian daripada umat Islam yang salah faham atau melampaui dalam melaksanakan tuntutan itu lalu mereka menggunakan batu-batu yang besar sebagai contohnya sehingga membebankan diri mereka sendiri atau menyusahkan diri sendiri.

Kedua: Larangan Mengada-adakan Sesuatu Baharu Berkaitan Agama

Mengada-adakan sesuatu yang tidak disyariatkan atau tidak pernah dilakukan oleh Nabi SAW sebagai pembawa syariat khususnya dalam soal agama (ibadah) adalah sesuatu tindakan yang sangat dilarang. Bahkan, tindakan tersebut termasuk dalam perbuatan yang ditolak dan kemungkinan besar amalan atau ibadah tersebut tidak mendapat sebarang pahala di sisi Allah dan jauh daripada penerimaanNya. Daripada Umm al-Mu'minīn 'Āishah RA berkata, Rasulullah SAW bersabda:

مَنْ أَحْدَثَ فِي أَمْرِنَا هَذَا مَا لَيْسَ مِنْهُ فَهُوَ رَدٌّ.

Terjemahan: “Sesiapa yang mengada-adakan suatu perkara di dalam urusan [agama] kami ini yang bukan berasal darinya, maka ia pasti tertolak.”³⁷

³⁶ Ahmad bin 'Alī bin Hajar al-'Asqalānī, *Fath al-Bārī Sharḥ Ṣaḥīḥ al-Bukhārī*, (Beirut: Dār al-Ma'rifah, 1957), 13:278.

³⁷ Hadith riwayat al-Bukhārī, Kitāb al-Ṣiḥḥ, Bab Idhā Iṣṭalaḥu alā ṣulḥ al-jawrī fa al-Ṣulḥ Mardūd, no.hadith 2697; Ṣaḥīḥ Muslim, Kitāb al-'Aqdiyah, Bab Naqd al-Aḥkām al-Bāṭilah waruddu al-Muhaddathāt al-Umūr, no.hadith 4492; Sunan Ibn Mājah, Kitāb al-Sunnah, Bab Ta'zīm Ḥadīth Rasul Allāh SAW wa al-Taghliz 'alā min 'Ariduh, no.hadith 3864; Sunan Abū Dāwūd, Kitāb al-Sunnah, Bab fī Luẓum al-Sunnah, no.hadith 14. Lihat Abū 'Abd Allāh Muḥammad bin Ismā'īl al-Bukhārī, *al-Jāmi' al-Ṣaḥīḥ al-Bukhārī*, ed. Muḥib al-Dīn al-Khātib (Kaherah: Matba'ah al-Salāfiyah, 2000) 267; Muslim bin al-Ḥajjāj Abū Ḥusayn al-Qushayrī al-Naysabūrī, “Ṣaḥīḥ Muslim,” 982. Ibn Mājah, “Sunan Ibn Mājah”, 2475 dan Abū Dāwūd, “Sunan Abū Dāwūd,” 1561.

Dalam hadith, kalimah *radd* bermaksud tertolak atau tidak sah. Manakala ungkapan *mā lays minhu*, iaitu bukan dari urusan kami bermaksud sesuatu yang bukan dari hukum asalnya. Jadi, hadith ini menyatakan tentang larangan tegas kepada sesiapa yang mengada-adakan sesuatu yang baharu dalam urusan agama atau melakukan sesuatu yang tidak dituntut dalam Islam.³⁸ Sekiranya amalan yang dilakukan tidak bertepatan dengan apa yang dibawa oleh Nabi SAW, maka ianya akan terus tertolak dan tidak diterima walaupun amalan yang dilakukan itu berniat ikhlas. Hal ini kerana antara syarat untuk amalan itu diterima adalah salah satunya amalan itu mestilah tidak berlebih-lebih dan mengikut apa yang dituntut oleh Rasulullah SAW. Maksudnya di sini, perbuatan yang dilakukan itu dinilai sebagai ibadah tetapi ianya tidak bersumberkan ajaran Islam atau tidak juga memiliki landasan yang jelas dan lebih dikenali dalam agama dengan istilah bidaah.³⁹ Manakala menurut pendapat al-Shāṭibī dalam menerangkan maksud perbuatan bidaah ini adalah sesuatu cara atau tindakan beragama yang diada-adakan dengan menyerupai syari'at. Hal itu dilakukan oleh golongan tersebut dengan bertujuan untuk melebih-lebihkan dalam beribadah kepada Allah SWT.⁴⁰ Sesetengah pendapat, ada mengatakan bahawa seseorang itu juga boleh dianggap sebagai pelaku bidaah apabila mengharamkan hal-hal yang halal (mubah) iaitu dibolehkan ataupun beribadah kepada Allah SWT dengan amal ibadah yang tidak diajarkan dalam syari'at Islam.

Dapat diketahui dari hadith ini, semua bentuk amalan dan perbuatan yang tidak bersandarkan kepada dalil nas yang jelas adalah tidak diterima serta tertolak. Agama Islam merupakan agama yang sempurna dan tidak ada kurang dan lebihnya. Oleh itu, agama Islam bukannya agama yang berdasarkan *ibtidā'* iaitu mengada-adakan sesuatu tanpa dalil dan Rasulullah SAW sendiri telah menyebutkan supaya umat Islam tidak melakukan sikap berlebih-lebihan dan mengada-adakan.⁴¹

³⁸ Muhyiddin Yahya bin Sharaf Nawawi, *Hadith Arba'in Nawawiyah*, terj Abdullah Haidhir (Indonesia: Maktab Dakwah dan Bimbingan Jaliyat Rabwah, 2007), 22.

³⁹ Al-Nawāwī, *Hadith Arba'in Nawawiyah*, 22.

⁴⁰ Al-Nawāwī, *Hadith Arba'in Nawawiyah*, 22.

⁴¹ Nawawi, *Hadith Arba'in Nawawiyah*, 23.

Hadith ini dapat dikaitkan dengan satu hadith sahih, iaitu Ibn Abi Awfa telah berkata:

النَّاجِشُ: آكِلٌ رِبَاً خَائِنٌ وَهُوَ خِدَاعٌ بَاطِلٌ لَا يَحِلُّ، قَالَ النَّبِيُّ صَلَّى اللَّهُ عَلَيْهِ وَسَلَّمَ: الخَدِيعَةُ فِي النَّارِ، مَنْ عَمِلَ عَمَلًا لَيْسَ عَلَيْهِ أَمْرُنَا فَهُوَ رَدٌّ.

Terjemahan: *Al-Nājish* adalah pemakan riba dan pengkhianat. Ia merupakan tipu muslihat yang batil dan sama sekali tidak dihalalkan. Nabi SAW bersabda: “Orang yang melakukan penipuan berada di neraka; dan sesiapa yang mengerjakan sesuatu amalan yang bukan termasuk urusan kami, maka ia tertolak.”⁴²

Perkataan *Nājish* menurut bahasa adalah mengusik buruan serta membuatnya meninggalkan tempatnya untuk diburu. Manakala dalam syariah bermaksud penambahan harga suatu barang dari orang yang tidak bermaksud membelinya untuk menipu orang lain agar membelinya.⁴³ Jadi, dalam hadith ini Nabi SAW menunjukkan satu contoh perbuatan menipu atau mengadakan sesuatu yang berkait dengan urusan jual beli yang melibatkan transaksi riba.

Ketiga: Agama Islam itu Mudah dan tidak Memberatkan atau Membebankan.

Agama Islam adalah agama yang mudah dan tidak membebankan umatnya. Dalam hadith daripada Abū Hurayrah RA daripada Nabi SAW bersabda:

إِنَّ الدِّينَ يُسْرٌ، وَلَنْ يُشَادَّ الدِّينَ أَحَدٌ إِلَّا عَظِبَهُ، فَسَدِّدُوا وَقَارِبُوا، وَأَبْشِرُوا، وَاسْتَعِينُوا، بِالْعَدْوَةِ وَالرَّوْحَةِ وَشَيْءٍ مِنَ الدُّبْحَةِ.

Terjemahan: “Sesungguhnya agama (Islam) itu mudah. Tidaklah seseorang mempersulit (berlebih-lebihan) dalam agama melainkan ia akan dikalahkan. Oleh itu, kerjakanlah dengan semestinya, atau mendekati semestinya dan

⁴² Hadith riwayat al-Bukhārī, Kitāb al-Buyū‘, Bāb al-Najash, wa Man Qāla: “La Yajūz Dhālik al-Bay‘, no. hadith 2134. Lihat Al-Bukhārī, “Ṣaḥīḥ al-Bukhārī”, dalam *Mawsū‘at al-Ḥadīth al-Sharīf*, 167.

⁴³ Ibn Ḥajar al-‘Asqalānī, *Fath al-Bārī*, 12:211.

bergembiralah (dengan pahala Allah) dan mohonlah pertolongan di waktu pagi, petang dan sebahagian malam”⁴⁴

Dalam hadith, ungkapan *Inn al-Dīn yusr* atau “Sesungguhnya agama itu mudah” membawa maksud ciri-ciri agama Islam adalah sebagai agama yang diturunkan kepada umat manusia yang terakhir dalam bentuk yang sempurna, agama Islam adalah agama yang telah direndhai oleh Allah SWT. Kemudian, kalimah *al-Ghadwah* bermaksud permulaan waktu tengahari, dan *al-Rawhah* pula bermaksud sewaktu terbenamnya matahari, dan *al-duljah* pula pada waktu akhir malam. Perkataan *saddidū* bermaksud mengerjakan sesuatu ibadah dengan benar dan tidak berlebihan dan tidak pula mengurangnya, *qāribū* bermaksud, sekiranya ibadah yang dilakukan itu tidak sempurna maka hendaklah mengerjakan yang dekat dengan kesempurnaan, dan juga *abshirū* bermaksud bahawa bergembiralah kerana akan mendapat balasan pahala atas amal yang dilakukan terus-menerus walaupun sedikit.⁴⁵ Jadi, keseluruhan ungkapan ini merujuk kepada maksud bahawa setiap amalan yang dilakukan, hendaklah disempurnakan dengan baik, bukan dilakukan sehingga membebaskan diri sendiri. Bahkan, berusaha bagi mencapai kesempurnaan kerana dijanjikan balasan pahala di sisi Allah SWT.

Kemudian, istilah *mutashaddid* iaitu merujuk kepada orang yang berlebihan itu akan dikalahkan juga oleh agamanya, yakni golongan yang suka memberat-beratkan dalam beribadah, pada akhirnya tidak akan terdaya serta merasa jemu untuk melaksanakan tuntutan agama tersebut.⁴⁶ Dalam hal ini, boleh diibaratkan bagi sesiapa yang memberatkan diri sendiri, pada akhirnya nanti akan merasa letih dan penat dalam melaksanakan tuntutan tersebut. Sedangkan diketahui bahawa ciri-ciri agama Islam adalah mudah, sempurna dan tidak membebani diri. Perlakuan berlebih-lebihan itu akan mengundang tindakan

⁴⁴ Hadith Riwayat al-Bukhārī, Kitāb al-Īman, Bāb al-Dīn Yusrun, no. hadith 39, dan Kitāb al-Marīḍ, Bāb Tamanni al-Marīḍ al-Mawta, no. hadith 5673. Rujuk al-Bukhārī, “*Ṣaḥīḥ al-Bukhārī*”, dalam *Mawsū‘at al-Ḥadīth al-Sharīf*, 5 dan 486.

⁴⁵ Muḥammad bin Ismā‘īl Abū ‘Abd Allāh al-Bukhārī, *al-Jāmi‘ al-Ṣaḥīḥ al-Mukhtaṣar (Ṣaḥīḥ al-Bukhārī)*, ed. Muṣṭafā Dīb al-Bughā (Beirut: Dār Ibn Kathīr, 1987), 5:2147 dan Ibn Hajar al-Asqalani, *Fathul Bari: Penjelasan Kitab Shahih al-Bukhari*, 1:169.

⁴⁶ Al-Asqalani, *Fathul Bari: Penjelasan Kitab Shahih al-Bukhari*, 1:169.

yang lebih negatif atau menimbulkan perasaan jemu dan bosan dalam diri individu tersebut. Justeru, Nabi SAW telah menyuruh agar umat baginda melakukan ibadah pada masa dan waktu yang ditentukan iaitu waktu pada pagi, petang dan malam sesuai dengan kemampuan manusia itu sendiri

Jadi, dalam hadith di atas jelas menunjukkan bahawa baginda SAW melarang memiliki sikap *ghuluw* atau *tanattu'* atau *tashaddud*, kerana ianya bukan sahaja boleh membinasakan diri yang melakukannya, tetapi juga boleh merosak imej Islam. Tambahan lagi, diketahui bahawa Nabi SAW diutuskan sebagai “pemudah cara” bukan membebani umat baginda.

Rasulullah SAW pernah bersabda di dalam hadithnya yang bermaksud: “Sesungguhnya Allah SWT tidak mengutusku untuk mempersulit atau memperberat, melainkan sebagai seorang pengajar yang memudahkan.”⁴⁷ Secara dasarnya, agama Islam yang diturunkan oleh Allah SWT adalah mudah kerana Allah mengetahui kemampuan yang ada pada manusia seperti firmanNya dalam surah al-Baqarah ayat 286 yang bermaksud: “Allah tidak membebani seseorang melainkan sesuai dengan kesanggupannya”; dan firman Allah SWT lagi pada ayat 185 surah al-Baqarah yang bermaksud: “Allah menghendaki kamu beroleh kemudahan dan Ia tidak menghendaki kamu menanggung kesukaran”.

Ibn Hajar al-‘Asqalānī telah memberikan contoh berkaitan ciri agama Islam yang mudah serta membezakan Islam daripada agama lain yang wujud di dunia ini. Contohnya tentang taubat, di mana umat terdahulu untuk diterima taubatnya, sangat rumit sehinggakan ada dalam kalangan mereka yang diharuskan untuk bunuh diri. Sedangkan bagi kaum Muslimin cukuplah hanya dengan menyesali dosa-dosanya, tetapi seharusnya berjanji tidak mengulangi kesalahan dan kesilapan yang dilakukan dahulu serta memperbanyakkan kebaikan. Menurutnyalah, hadith ini berkait rapat dengan hadith-hadith sebelumnya iaitu hadith mengenai ibadah solat, puasa, dan jihad adalah sebahagian daripada iman dan merupakan ibadah utama bagi umat Islam. Walau bagaimanapun hadith ini memberi peringatan bahawa dalam

⁴⁷ Hadith riwayat Muslim, Kitāb al-Ṭalāq, Bab Bayān an Takhyirah Imra'atah lā Yakuna Ṭallaqan illā bi al-Niyah, no. hadith 3690. Lihat Muslim bin al-Ḥajjāj Abū Ḥusayn al-Qushayrī al-Naysabūrī, “Ṣaḥīḥ Muslim,” 929.

melaksanakan ibadah-ibadah tersebut haruslah bersesuaian dengan ciri-ciri agama Islam yang mudah dengan tidak membebankan diri dan terlampau ekstrem (berlebih-lebih).⁴⁸

Demikian juga Badr al-Dīn al-‘Aynī menyebutkan bahawa maksud “Agama (Islam) itu mudah” iaitu dari aspek puasa Ramadan di mana diharuskan untuk melewatkannya (atau menggantikannya) pada masa yang lain disebabkan oleh musafir atau sakit yang berbeza dengan solat (yang tidak boleh berbuat demikian). Demikian juga boleh meninggalkan puasa itu bagi orang yang sangat tua, yang memadai dengan membayar fidyah sahaja (sebagai ganti puasa itu) tetapi tidak pada solat. Bahkan, puasa itu hanya dilaksanakan hanya sebulan dalam tempoh setahun (12 bulan) sedangkan puasa perlu dilakukan setiap hari siang dan malam lima waktu.⁴⁹

Kemudian, agama Islam itu mudah juga boleh dinisbahkan kepada zatnya iaitu perihal agama Islam itu sendiri dan perbandingan dengan agama-agama yang lain. Zahirnya, Allah SWT telah mengangkat segala kepayahan kepada umat-umat seperti tidak harus solat di masjid, tidak boleh bersuci dengan debu tanah, tidak boleh memotong pakaian yang terkena najis dan diterima taubat dengan membunuh diri dan sebagainya. Dengan kelembutan dan rahmat Allah, diangkatkan semua itu daripada umat Nabi SAW sesuai dengan firman Allah SWT ada ayat 87 surah al-Hajj:

وَمَا جَعَلَ عَلَيْكُمْ فِي الدِّينِ مِنْ حَرَجٍ.

Terjemahan: “Dia (Allah) tidak menjadikan kamu menanggung sesuatu keberatan dan susah payah dalam perkara agama.”⁵⁰

Ibn Baṭṭāl menyatakan bahawa yang dimaksudkan dengan *al-Dīn* merujuk kepada *al-A‘māl* (segala pekerjaan atau amalan) kerana itu dikatakan *al-Dīn yusr* (agama itu mudah). Kemudian, segala kemudahan itu telah diterangkan dalam hadith (di atas) “kerjakanlah keseluruhannya daripada segala amalan perbuatan”. Sedangkan *al-Yusr* itu merujuk kepada maksud *al-Lin* (lembut)

⁴⁸ Al-‘Asqalānī, *Fath al-Bārī Sharḥ Ṣaḥīḥ al-Bukhārī*, 1:93. Rujuk juga Ibn Hajar al-Asqalānī, *Fathul Bari: Penjelasan Kitab Shahih al-Bukhari*, 1:170

⁴⁹ Badr al-Dīn al-‘Aynī, ‘*Umdah al-Qārī*, 2: 126-127.

⁵⁰ Al-‘Aynī, ‘*Umdah al-Qārī*, 2:127

dan *al-Inqiyād* (mudah diuruskan atau dilaksanakan). Manakala *al-Dīn* yang disifatkan dengan sifat mudah dan payah itu adalah merujuk kepada segala amal perbuatan.⁵¹

Merujuk kepada hadith-hadith tersebut dapat diringkaskan pemahaman berkaitan dengan ekstrem dalam kerangka hadith adalah seperti dalam jadual berikut:

Jadual 3.0: Skop Makna dari Sudut Pemahaman Terhadap Istilah Ekstrem dalam *al-Kutub al-Sittah*

Tema	Tema dalam Hadith Berkaitan dengan Ekstrem	Aspek Perbincangan Hadith dan Batasan Makna dari Sudut Ekstrem
I	Larangan Melampaui Batas, Ekstrem atau Memberatkan Sesuatu	Perbincangan terhadap tiga hadith yang menyebutkan tentang larangan yang jelas daripada sikap ekstrem iaitu merujuk kepada kecelakaan bagi orang yang melampaui batas (<i>al-Munaffi'ūn</i>); larangan membebani diri (<i>al-Takalluf</i>) dan larangan berlebih-lebihan dalam agama (<i>al-Ghuluw</i>). Makna dalam ketiga-tiga hadith ini jelas bersifat teori umum berkaitan dengan ekstrem dan merujuk kepada skop yang berbeza dan membicarakan bentuk-bentuk atau ciri-ciri yang melambangkan kepada ekstrem atau sikap ekstrem itu.
VIII	Larangan Mengada-adakan Sesuatu Baharu Berkaitan Agama	Perbincangan berkaitan dengan tindakan mengadakan sesuatu yang tidak ada dalam agama khusus berkaitan dengan ibadah bermakna bahawa telah melampaui atau berlebih-lebih dalam agama
IX	Agama Tidak Memberatkan/ Membebankan	Perbincangan berkaitan dengan tindakan atau sikap yang suka membebani diri atau memberatkan diri dengan sesuatu yang tidak diajar dalam agama dianggap sebagai tindakan ekstrem dalam beragama. Sebenarnya Islam agama yang memudahkan bukan memayahkan.

⁵¹ Al-‘Aynī, *‘Umdah al-Qārī*, 2:127

Penutup

Berdasarkan kepada perbincangan berkaitan dengan ekstrem dengan rujukan kepada nas al-Quran dan hadith serta penjelasan daripada para pentafsir dan pensyarah hadith dapat disimpulkan bahawa terdapat beberapa istilah yang dapat menjelaskan tentang ekstrem sama ada bersifat umum pemahaman daripada nas atau bersifat secara khusus. Daripada rujukan nas al-Quran dan hadith, terdapat beberapa ungkapan seperti *al-takalluf*, *al-tanaṭṭu'*, *al-mu'tadīn*, *al-ghuluw*, *al-tashdīd* dan sebagai. Keseluruhan apa yang difahami dan digambarkan dalam al-Quran dan hadith menggambarkan kepada keadaan di mana sikap atau tindakan seseorang yang ekstrem yakni melampau sehingga berlebihan dalam melakukan sesuatu ibadah, sikap memberatkan diri dalam sesuatu perbuatan serta sikap melampaui batas dan had yang ditetapkan. Dalam hadith didapati juga bahawa tindakan mengada-adakan sesuatu yang baharu dalam soal berkaitan dengan agama adalah juga termasuk dalam sikap ekstrem. Dalam pada itu, sifat agama yang memudahkan dan tidak memayahkan atau membebankan penganut jelas menunjukkan bahawa Islam melalui pemahaman terhadap nas al-Quran dan hadith Nabi SAW, jelas melarang perbuatan atau sikap ekstrem tersebut.

Penghargaan:

Artikel ini hasil daripada penyelidikan di bawah geran penyelidikan University Malaya Research Grantt (UMRG) bernombor RG482-15HNE bertajuk: "*Menangani Budaya Pemikiran Ekstrem Agama dalam Kalangan Belia: Ke Arah Penyelesaian Melalui Kerangka Al-Quran dan Al-Sunnah.*"

Rujukan

Achmad Mubarak MA. "Fanatik dan Toleransi", laman sesawang *Mubarak Institute*, dicapai 25 Julai 2016, <http://mubarak-institute.blogspot.my/2010/12/fanatik-dan-toleransi-oleh-prof-dr.html>.

Al-ʿAynī, Badr al-Dīn Abū Muḥammad Maḥmūd bin Aḥmad. *ʿUmdah al-Qārī Sharḥ Ṣaḥīḥ al-Bukhārī*, ed. ʿAbd Allāh Maḥmūd Muḥammad ʿUmar. Beirut: Dār al-Kutub al-ʿIlmiyyah, 2001.

- Al-Bukhārī, Abū ‘Abd Allāh Muḥammad bin Ismā‘īl. *Al-Jāmi‘ al-Ṣaḥīḥ al-Bukhārī*, ed. Muḥīb al-Dīn al-Khātib. Kaherah: Matba‘ah al-Salāfiyah, 2000.
- Al-Bukhārī, Muḥammad bin Ismā‘īl Abū ‘Abd Allāh. *Al-Jāmi‘ al-Ṣaḥīḥ al-Mukhtaṣar (Ṣaḥīḥ al-Bukhārī)*, ed. Muṣṭafā Dīb al-Bughā. Beirut: Dār Ibn Kathīr, 1987.
- Dewan Bahasa dan Pustaka, “ekstreme”, laman sesawang Pusat Rujukan Persuratan Melayu, dicapai 4 Februari 2016, <http://prpm.dbp.gov.my/Search.aspx?k=ekstreme>
- Dinda Ayu Kusumaningtyas. “Fanatisme dan Radikalisme Agama”. Latihan Ilmiah di Jurusan Sistem Informasi, Sekolah Tinggi Manajemen Informatika dan Komputer, AMIKOM, Yogyakarta, 2011.
- Ibn Ḥajar al-‘Asqalānī, Aḥmad bin ‘Alī. *Fath al-Bārī Sharḥ Ṣaḥīḥ al-Bukhārī*. Beirut: Dār al-Ma‘rifah, 1957.
- Ibn Hajar al-Asqalani. *Fathul Bari: Penjelasan Kitab Shahih al-Bukhari*, terj Amir al-Din, ed. Abu Rania. Jakarta: Pustaka Azzam, 2011.
- Ibn Manẓūr, Muḥammad ibn Mukarram ibn ‘Alī ibn Aḥmad. Lisān al-‘Arab (Kaherah: Dār al-Ma‘ārif), 9:113.
- Mansor Mohd Noor. “Memahami dan Mengurus Ekstreisme Agama di Malaysia”, *Journal of Ethics, Legal and Governance* 1 (2005), 53.
- Marwan Hadidi. S.PdI, Artikel: Perintah Yang Disesuaikan Dengan Kemampuan. Jakarta: Yayasan Pendidikan Islam al-Atsary, 2014.
- Mawsū‘at al-Ḥadīth al-Sharīf: al-Kutub al-Sittah, ed. Ṣāliḥ bin ‘Abd al-‘Aziz Al al-Shaykh. Riyadh: Dār al-Salām, 2000.
- Md Asham bin Ahmad. “Moderation in Islam: A Conceptual Analysis of Wasatiyyah”, *TAFHIM: IKIM Journal of Islam and the Contemporary World* 4, (2011): 29-46, 43.
- Mohamad Kamil Hj Ab Majid. “Fanatik dan Taksud dalam Islam: Analisis Pandangan al-Qardawi”, *Jurnal Usuluddin* 18, (2003), 27.
- Mohd Roslan Mohd Nor. *Kefahaman Islam Semasa di Malaysia: Realiti dan Cabaran (Ekstreisme rentas agama dan tamadun)*. Selangor: Persatuan Ulama’ Malaysia, 2015.

- Muhammad Yusuf al-Qaradawi. *Kebangunan Islam di Antara Tentangan dan Ekstrimisme*, terj. Muhammad Rivai Batubara. Kuala Lumpur: Angkatan Belia Islam Malaysia, 1984.
- Muhyiddin Yahya bin Sharaf Nawawi. *Hadith Arba'in Nawawiyah*, terj. Abdullah Haidhir. Indonesia: Maktab Dakwah dan Bimbingan Jaliyat Rabwah, 2007.
- PKPIM UNISEL, "Pengertian Ekstremisme," laman sesawang PKPIM UNISEL, dicapai pada 22 November 2015, <http://uniselpkpim.blogspot.my/2009/09/pengertian-ekstremisme.html?m=1>.
- Santayana, George. *Life of Reason: Reason in Common Sense*. New York: Charles Scribner's Sons, 1905.
- Shams al-Ḥaḡ, Abī Ṭayyib Muḡammad. *Awn al-Ma'būd Sharḡ Sunan Abī Dāwūd*, ed. 'Abd al-Raḡman Muḡammad 'Uḡmān. Madinah: Maktabah al-Salāfiyah, 1968.
- Syāhīn Lashīn, Mūsā. *Fath al-Mu'īn Sharḡ Ṣaḡīḡ Muslim*. Kaherah: Dār al-Syuruq, 2002.